

松下雜鈔

松下雜抄卷上

周玉繩之再相也。以丹陽賀監生虞城某共斂金屬太監某乘間復相。主事吳昌時之力居多。蓋辛巳之四月也。清兵入內地。特命周以閣部督師。畏不敢偪。適天氣炎熱。清兵大掠而去。遂報捷音。進位太師。有山人題詩以譏之。敵畏炎歆歸思催。黃金紅粉盡馱回。出關一月無消息。昨夜元戎報捷來。旣而臺省交章論延儒受賄縱敵。至癸未四月始放回。七月著延儒聽勘。再召時。張溥馬世奇以公論感動之。故其舉措盡反前事。上亦虛己以聽之。後溥歿。世

奇遠權勢。不入都。延儒左右皆昌時輩。故至於敗。而罷廠衛。撤內監。尤爲諸璫所怒。至是行邊。諸璫盡發其奸。及昌時旣誅。延儒以青衣入見。上令自陳。遂上疏引罪。奉旨。周延儒機械欺蔽。比匪營私。濫用匪人。封疆貽禍。姑念首輔。著三法司堂上官於寓所勒令自裁。仍具棺殮。聽其回籍。該衙門知道。

吳昌時少受業於周忠毅宗建。故與清流通聲氣。然爲人墨而狡。旣通籍。日奔走權要。探刺機密。以炫粥市重。周延儒之再起也。昌時爲通關節。及爲首輔。其辛未所取士馬世奇。本延儒師。力勸以正。故初治事。頗有賢聲。而昌時則

挾勢弄權。大啓倖門。延儒視師通州。一晨而昌時之啟八至。帝密刺之。知其交關狀而未發。吏部舉行年例。先擇選司。故事副郎有調部者。正郎則不調。昌時欲持權。使人誑冢宰鄭三俊曰。昌時持正有風力。主年例爲宜。遂從儀制。正郎調文選。事爲破格。人皆側目。及舉行年例。出異己者十人於外。一時大譁。旣而御史蔣拱辰劾昌時贓私巨萬。事多連延儒。并言內通中官。漏洩禁密。帝震怒。御中左門親鞫之。遂下獄論死。且有誅延儒意。時魏藻德新入閣。有寵。謂其師薛觀國之死。昌時實致之。恨昌時甚。因與陳演共排延儒。掌錦衣者賂養性復騰蜚語。帝命削延儒籍。勒

其自盡。昌時棄市。

萬曆丙辰科第六名中式舉人趙鳴陽。爲第一名沈同和。事敗喫累。雖鳴陽未得廷試。然文名藉甚。御茶居牌子魏學顏深慕之。以重幣延至外邸。訓其姪廷獻。入豐潤縣庠。學顏於神廟時。奏對便捷。最有寵。光廟登極。陞秉筆。尋准辭任閒住。鳴陽在京師。道大行。遊山西。主鄭宗周家。天啟甲子冬。河南獻寶璽後。相國魏廣微等交通逆賢。大工興後。崔呈秀等接續布罪。凡先帝一應長旨意。長聖諭。迴與癸亥以前。文氣不同。人頗駭訝。彼時通內導逆諸臣。大布謠言於外曰。涂文輔是秀才出身。趙鳴陽入幕在內。南北

傳播人多信以爲實。時今上在朱邸。或亦聞之。崇禎戊辰六月。中府會審李永貞等。永貞昧心。妄攀鳴陽。蓋欲以賒目前之死。誣陷人性命。罔恤也。其年冬。臺臣陳乾陽偶有疏波及之。奉旨逮鳴陽。獄急時。大司寇喬公允升總憲曹刊今酌中志公于汴。咸心知其冤。而苦於無據。乃於己巳七

月。提取若愚并永貞姪男僕人。赴都城隍廟。面質鳴陽。若

愚曰。永貞若愚。心本不同。各人自有本末。扱

迄及切
領取也

者自

扱。不扱者自不扱。此形可碎。此心難昧。必不忍以人之妄加己者。而亦妄加之人也。鳴陽並不曾入魏忠賢之幕。中外之語。皆因鳴陽曾在魏學顏家教書。人遂誤謂入魏忠

賢之幕也云云。時舉人曾

本酌作中曾

刊

泰然生員魏廷獻等

可數百人。皆鳴陽門人。俱爲鳴陽申訴。問官董公羽宸等共九位。皆感動首肯。鳴陽得擬杖過堂覆允。案存刑部江南司。學顏至戊寅夏卒。年九十餘。

孝廟時。皇親恣橫。太監何文鼎掌乾清門。心不平。引祖宗家法極言直諫。文鼎與鮑太監忠最契厚。方草疏時。不令忠知。比燈下謄真之際。有一楨在門旁立。而一步一步行至案前。鼎怒罵曰。我爲國盡言。爾何物么魔敢來嚇阻我耶。疏上。上大怒。詔繫獄。雜追治之。務究所主使者。文鼎乃毒慘備嘗。曰有兩人俱山東籍貫。不可拘案。訊者曰。姑言

之對曰。孔子孟子也。文鼎旣死。猶能於禁中拽銅缸作聲稱冤。中外歎息。上亦感悟憐之。特令勒碑。并祭焉。

鐵嶺李氏。其先本朝鮮人。萬歷年間。成梁父子以斬級擴土功。加封伯爵。遂圖比照雲南例。要將山海以東世據之。永爲遼東鎮守。如黔國故事。凡當時仕於遼土者。多遭其齟齬。無不懼陰謀之叵測也。至萬曆三十三年春。成梁以寧遠伯總鎮遼東。巡撫趙公楫欲將鴉谷關外張其哈喇佃子處地方居民招徠內徙。以邀功賞。時先將軍應祺任遼陽副總兵。曾具呈阻之。奈撫鎮貪功之謀已成。見呈大怒。遂多方布弄。共欲甘心於先將軍。先將軍由此憤鬱成

疾。於本年夏告病回衛身故。痛哉。繼爲副總兵者。楊公如松也。其年冬。撫鎮果行文招徠。居民安土重遷。幾至激變。撫鎮必不肯中止。時已寒沍。乃復差廢弁韓宗功率領軍丁數千。裝塘馬驅逐之。焚其室廬。毀其器用。哭聲震野。有僵餒不支而死者。有渡河冰陷而死者。有不願徙而自經者。少壯強勇之人。亡入建夸十四五。僅得孤貧者六萬餘人。僉派於遼鎮二十五衛安插。奏聞神廟。督臣蹇公達并撫鎮。俱以招回功。各奏蒙賞賚。時四明沈相公一貫首揆也。遂將膏腴地數百里。畫爲建夸所得。丙午夏。遼鎮廣寧管餉通判徐公應乾。浙江紹興人。目擊遼鎮邊備大壞。條

上十五事於撫鎮。首列建酋一款。而二老不勝懷忌。秋七月。巡按蕭公淳檄委徐公閱視河東十四衛。於遼陽庫廩。見先將軍呈諫割地之案。爲賦二詩。以識不平。撫鎮聞之。遂捏陷徐公革職。建夸旣得數百里膏腴地。遂懷異心。隱憂日滋。自三十四五年後。兵科等衙門宋公一衛等。各疏劾棄地非是。內有云。劉副將一呈而輒死。徐通判二詩而去官。劉謂先將軍也。後宋公復有一疏。爲割地陷夸等事。奉神廟旨。這所奏棄地畀夸。事情重大。著都察院選差巡按御史勘明來說。欽此。奉差往勘者熊公廷弼。據石碑全遼地勘實題覆未結。其後李公奇珍等又疏云。夸人居之。

則爲夸地。華人居之則爲華地。今數十年生聚之民。上糧有倉串。人丁有徭役。何以謂之曰虜地。何以謂之曰逃民。云云。疏入不報。夸旣殷富。羣不逞之徒。復爲計畫從臾。四十六年春。楊公鎬爲經略。而四路之師岨矣。天啓元年春。失遼瀋。二年春。失廣寧。全遼淪陷。十餘年來。竭天下之力。未能雪恥。河西一帶。已非我有。況河東之棄地乎。此遼左決裂根因。實以貪功貽患。真可切齒痛恨也。李氏墳墓在鐵嶺者。盡爲夸發。封爵久懸難襲。宗功乃成梁姪婿。於天啓三年冬。爲夸奸細。訪獲正法。趙京師人。與稅監高淮契交。囊橐頗富。多置宅以居縉紳。其孫臺於崇禎五年冬。具

疏誇張祖功求己恩蔭奉旨遼鎮失事釀釁必非一朝趙
楫任撫有年何無先見豫籌任內招回人口是否功應蔭
敘着吏兵二部查議奏奪六年冬吏部坐名覆疏允送國
子監讀書七年冬大同總戎王公朴具疏奉旨戚司宗罪
案已定王業弘等爭襲事情已有旨了其李成梁孫該部
查議具奏司宗於九年恩審蒙釋成梁之後賴戚臣王昺
竭力營求近蒙允襲爵累臣竊痛乙巳至今時盈三紀實
歷四朝在位在埜恐知此棄地根因者絕少若非先將軍
由此招禍宋掌科具疏入告卽若愚亦不能記憶也封疆
大事父子至情謹書此以備採擇焉

篋頭房近侍十餘員。專習爲皇子女請髮留髮入囊整容之事。凡誕生皇子女。彌月剪胎髮。百日命名後。按期請髮者。如外之每次剃頭者然。一莖不留如佛子焉。皇子戴玄青縐紗。六瓣有頂圓帽。名曰瓜拉冠。至十餘齡留髮。約年餘。又擇吉入囊。總束於後。冬用玄色紵。夏用玄色紗作囊。闊二寸許。長尺餘。垂於後。至選婚有妃。始擇吉行冠禮。此皇子事也。皇女戴寸許闊小頭箍。至十餘齡留髮。約年餘。又擇吉打扒角。至選婚有駙馬。始擇吉上頭。此皇女事也。崑山顧瑞屏先生諱錫疇。字九疇。崇禎朝官大宗伯。甲申國變後。在溫州。丙戌六月十六日。爲同事賀君堯所害。沈

之江華亭令張調鼎字太羹公門生也好請乩仙忽瑞翁
來降太羹怪問曰老師何時登道山乩曰吾於前六月十
六日被副將賀君堯害我于江中矣張問賀與師何仇乩
曰老夫前世乃天台一老僧也因託鉢回路逢巨蛇以杖
擊殺之賀卽蛇後身也冤對相尋因果應受可語我兩兒
切勿報仇張卽遣人至溫州蹤跡之一一不爽後君堯入
海亦爲人所殺此晦山現果隨錄云也又云溫州蔡君符
親說余己丑秋在吳中開元寺硯友吳純祐來晤余以其
曾爲永嘉令談及瑞翁事純祐曰此弟所身經而目擊者
也丙戌六月十六日弟讌瑞翁於江心寺月夜話別明晨

報瑞翁被害。弟召募漁人撈之。無影響。當夜夢瑞翁立水中。余急命掖之登岸。瑞翁曰。余前世一天台老僧。誤殺一蛇。今抵其命。承公厚意。營我後事。以公前世係我徒孫。有方外一脈親故也。明日。但向某灣尋之。余卽在矣。早起詢漁人。果有其灣。一尋而獲。乃力助扶櫬歸崑祖塋焉。純祐諱國杰。庚辰進士。公沒後三年。司理席君教事。亦遇公降乩。問賀因果。公留詩云。我昔曾爲僧。彼亦在山林。蟒蛇在孔道。山人皆爲驚。老僧題錫杖。隨步出山門。動起無名火。杖下化爲塵。夙緣前已定。從此樂天真。三事一轍也。

餘姚黃百家耳逆草。康熙癸丑某月。內閣學士哲爾肯等

奉命撤藩未至滇。吳三桂已叛。筆帖式党古禮馳赴京師。十二月十九日聞叛信。吳逆子應熊若罔聞者。二十日執熊。廿一日發兵部。京師洶洶。有鑲黃旗武監生郎廷樞家僕騷韃子。告以家人某某久蓄異志。約舉大事。今見事急。欲於一二日內卽起。主其圖之。於是執送兵部官。兵部官不爲意。次早。凡家奴出首主人執送者不絕。始大駭。奏聞。奉旨窮究。方知爲吳應熊之謀。據供。應熊遣人密約。凡京師滿洲漢軍之奴僕佃戶。能殺其主者。卽得其主之妻妾家當。能暗殺多人者。以差授職。授總兵官者。管姓名冊。總兵以上。給劄付紅布木印。錫印不等。總兵以下。給劄付紅

布在冊無職者各給紅布二塊。八旗下無家不徧。約於甲寅元旦慶賀時。各奴之在家者。於各家積柴草處放火。殺家人之不在冊者。以分執其妻孥。其隨主人在朝者。見火起。則騎各官之馬。喊殺入朝。至期。凡頭腰裹紅布者免難等語。於是張兵城上。閉九門。盡守城中欄柵。按冊排甲牢搜。搜得以黑絹蒙賊首面。城中不火食者三日。而各處火起者無數。白日昏黑。居人面皆土色。獲賊既多。斬決無地。以車滿載出九門斬之。尸積如山。如是者八日。乃奉上諭。殺戮過多。凡止有紅布無劄付與印信者皆免究。得釋者猶數千人。先是吳逆未叛之前。京師哄傳不日當有大難。